



OPĆINA TEŠANJ

IZVJEŠTAJ 2013.

OPĆINSKOG NAČELNIKA

za period od 01.01. do 31.12.2013. godine

Broj: 02-49-2-83/14

Datum: 13.01.2014. godine

Sadržaj

UVOD	3
LOKALNA UPRAVA	4
REALIZACIJA STRATEŠKIH DOKUMENATA	5
EKONOMIJA I POSLOVNO OKRUŽENJE.....	6
EKOLOGIJA.....	8
MLADI.....	9
KULTURA I NASLIJEĐE	9
POLJOPRIVREDA	9
KOMUNALNA INFRASTRUKTURA I SAOBRAĆAJ.....	10
JAVNA PREDUZEĆA I USTANOVE	11
MJESNE ZAJEDNICE.....	11
NVO.....	11
BORAČKE POPULACIJE.....	12
PENZIONERI, SOCIJALNA ZAŠTITA.....	13
DOMAĆE I MEĐUNARODNE INSTITUCIJE-SARADNJA SA DRUGIMA.....	13

On mora izrasti iz unutrašnjosti naroda.

Mahatma Gandhi

UVOD

Općinski načelnik i Općinsko vijeće Tešanj dva su lokalna organa lokalne vlasti i zajednički su odgovorni za funkcioniranje jedinice lokalne samouprave, te pojedinačno odgovornosti za ostvarivanje vlastitih nadležnosti.

Pomenuta odgovornost proizilazi iz izvornih (direktnih) i prenesenih (dodijeljenih) nadležnosti općine. Ove nadležnosti se mogu dijeliti na servisne (pružanje usluga) i regulatorne (utvrđivanje određenih politika, predlaganje i donošenje odluka, planiranje i koordiniranje određenih aktivnosti).

Lokalna samouprava i njen rad uređeni su Ustavom Federacije BiH, te posebno Zakonom o principima lokalne samouprave FBiH. Uređenje Bosne i Hercegovine, kao i sve specifičnosti postojanja i uređenja lokalne samouprave ukazuje na složene odnose.

Kada lokalnu samoupravu analiziramo na mikroplanu, onda je vidljivo da je riječ o teretu ostvarenja prave uloge lokalne samouprave, o tranzicijskom procesu u nadležnostima (počev od organa lokalne samouprave Općinskog vijeća i Općinskog načelnika), o finansijskim ograničenjima nametnutim od viših nivoa vlasti (primjer kredit MMF-a koji su koristili entiteti, a vraćaju i općine kroz raspodjelu sredstava PDV-a), o problemima „uzimanja i ostavljanja“ nadležnosti itd.

Uloga Općinskog načelnika određena je ustavnim, zakonskim i statutarnim definisanjem ovlaštenja i odgovornosti. Općinski načelnik, kao izvršni organ općine dužan je informirati Općinsko vijeće o ostvarivanju politike lokalne samouprave i ovaj Izvještaj to i jeste.

Da bi se sagledao ukupan rad Općinskog načelnika ovaj izvještaj bi trebao sadržavati mnogo više od napisanog; budžet i izvještaje o izvršenju budžeta, Informaciju o realizaciji Strategije razvoja, Izvještaj o realizaciji Liste kapitalnih projekata, te posebne izvještaje i informacije u kojima se može naći uloga i djelimična odgovornost načelnika: izvještaji o radu ustanova i preduzeća, mjesnih zajednica, saradnja sa NVO... Sve ono što je načelnik radio nije stalo u ovaj izvještaj.

Prilikom usvajanja Izvještaja o radu Općinskog načelnika za 2012. godinu iskazana su različita razmišljanja o očekivanoj formi i strukturi Izvještaja Općinskog načelnika, međutim ostalo se na razmišljanjima i različitim pogledima, bez konkretnih pomaka u jasnom preciziranu kakav se izvještaj očekuje. Kada je već tako, Općinski načelnik ima priliku da samostalno procjenjuje važnost određenih tema, njihovu širinu ili način predstavljanja, a s druge strane ostavlja puno prostora vijećnicima da kakav god izvještaj bio o istom raspravljaju na političkoj osnovi, bez stvarnog uvažavanja činjenica i okolnosti.

LOKALNA UPRAVA

Lokalna uprava je trenutno organizirana u 5 općinskih službi sa prosječnim brojem uposlenih tokom 2013 godine od 85 uposlenih i 11 vatrogasaca (ukupno 96 osoba, uključujući Općinskog načelnika i Pravobranilaštvo, vatrogasnu jedinicu). Prema trenutnim okolnostima Općina Tešanj ima mali broj zaposlenih u lokalnoj upravi, što je pozitivno po budžet općine i što treba zadržati i u narednim godinama.

a) Neposredno rukovođenje lokalnom upravom

Realizirano je ukupno 47 sastanka rukovodstva općine na kojima je razmatrano 85 tačaka dnevnog reda. Definirano je 200 zadataka i obaveza. Svi zapisnici su javni i nalaze se na općinskoj web stranici. Općinski načelnik je prema nadležnosti aktivni sudionik administrativnih procesa u općini i odgovoran za izvršenje Budžeta. Time se u stvari veliki dio vremena posveti redovnim poslovima rukovođenja administracijom.

b) Servisiranje rada Općinskog vijeća

Općinski načelnik i uprava servisirali su Općinsko vijeće pripremivši materijale za 90 tačaka dnevnog reda (34 tačke ranije planirane i 56 dodatnih), pripremivši 39 odluka, 18 rješenja i 33 izvještaja i informacije. Odgovoreno je na 123 vijećnička pitanja, dato mišljenje na 25 inicijativa i 69 amandmana.

c) Administrativne usluge lokalne uprave

Općina trenutno najveći broj administrativnih usluga pruža kroz servisne centre (šalter sale). Trenutno imamo organiziranih 5 servisnih centra (Tešanj, Jelah, Tešanjka, Kalošević i Šije). Ured u Šijama je počeo sa radom polovinom oktobra.

Treba reći da je u prethodnoj godini urađeno 147.461 ovjera dokumenata (više za oko 30.000 u odnosu na 2012), ili da je iz matičnih evidencija izdato 20.485 uvjerenja (više za oko 3000), izvršeno 17.132 CIPS provjera za lične dokumente (više za oko 4000).

Redovan servisni rad lokalne uprave podrazumijeva rješavanje upravnih postupaka. U 2013. godini situacija u tom pogledu izgledala je na slijedeći način:

Upisnik prvostepenih predmeta za organ uprave po službama - upravni postupak

Služba	Predmeti iz 2012	Predmeti iz 2013	Ukupan broj predmeta	Broj riješenih predmeta
Služba za društvene djelatnosti i investicije	453	662	1115	690
Služba za finansije, privredu, komunalne i inspekcijske poslove	36	755	791	780
Služba za katastar, urbanizam i imovinsko-pravne poslove	315	3134	3449	3116
Služba civilne zaštite	0	858	858	858
Služba za boračko-invalidsku zaštitu i opću upravu	608	1541	2149	1685
	1412	6950	8362	7129

d) Sistemi upravljanja kvalitetom i okolišom

U dosadašnjem periodu općina je uspostavila dva sistema upravljanja kvalitetom ISO 9001:2008, od 20. januara 2004. godine i ISO 14001:2004, od 16.02.2012. godine. Tokom 2013. godine organizirana su:

- Dva interna audita:
 - 1. interni audit 30.04.2013. godine
 - 2. interni audit 28. i 29.11.2013. godine
- Eksterni nadzorni auditi:
 - 1. nadzorni audit za 2013. godinu po ISO 9001:2008, 07.01.2014. godine
 - 2. nadzorni audit za 2013. godinu po ISO 14001:2004, 08.01.2014. godine

Sistem upravljanja kvalitetom podrazumijeva da se postavljaju i prati realizacija ciljeva sistema kvaliteta (u području zadovoljstva uposlenih i zadovoljstva korisnika usluga, ciljevi glavnih procesa obrade zahtjeva, izrade i realizacije budžeta, razvoja zajednice i donošenja i provođenja lokalnih propisa). Ciljevi kvaliteta i okoliša za 2013. godinu realizirani su u cijelosti.

e) **Edukacija i razvoj ljudskih resursa**

Tokom 2013 godine uposleni su prošli 18 internih edukacija realizovanih petkom ujutro u vremenu od 7:30 do 8:30, sa prosječno prisutnih 35 uposlenih. Od drugih edukacija obuku stranih jezika pohađa 5 uposlenika, uposlenici učestvuju na edukacijama koje organizuje domaće i strane organizacije u zavisnosti od potreba, kao i obuke koje organizuje Agencija za državnu službu FBiH koje će se intezivirati u 2014. godini.

Shodno obavezama iz Zakona svi uposleni prolaze kroz proces godišnjeg ocjenjivanja, a promjenom metodologije u 2013. godini svi uposleni su imali ciljeve koje trebaju realizirati.

Od 01.11.2013. godine primjenjuje se nova organizacija općinskih službi. Zadržan je isti broj službi ali su određeni proslavi preraspoređeni radi efikasnosti i sličnosti posla.

f) **Modeli i alati unapređenja**

CALL centar

CALL centar je alat kojim se omogućava građanima da anonimno prijavljuju probleme sa kojima se susreću, od problema na infrastrukturi do problema u ostvarivanju svojih prava, odnosa uposlenih lokalne uprave, ali i probleme u zajednici na koje općina ima uticaja (JU i JP). Prijave su anonimne i obrađuju se sa povratnom informacijom u roku od 72 sata. Ovaj alat je istovremeno i prevencija korupcije. Na ranije postojeći broj telefona uvedena je besplatna telefonska linija, građani koji koriste call centar tu uslugu ostvaruju potpuno besplatno 0800 234 55. U 2013. godini Call centar je dograđen kroz android aplikaciju, te je omogućeno da se osim glasovnih poziva šalju i fotografije sa GPS koordinatama. Tokom 2013. godine imali smo 113 javljanja, od čega je pozitivno riješeno 52 slučaja, 60 poziva je nepotpuno, poregešno ili je prekinuto, 1 je u procesu rješavanja.

REALIZACIJA STRATEŠKIH DOKUMENATA

Na početku 2013. godine, iz postojećih strateških dokumenata izdvojeni su projekti za prioritetnu realizaciju u prethodnoj godini (tada su na snazi još bilo više strateških dokumenata)



Iz ranije važećih strategija izdvojeno je 14 ciljeva, 7 iz Strategije razvoja 2007-2015, 2 iz Strategije za dostizanje vizije i 5 iz Strategije za podršku mladima. Svaki od projekata/ciljeva je imao svog menadžera, koji je periodično izvještavao o realizaciji planiranog. Nakon usvajanja nove Strategije razvoja započeti projekti su ostali u realizaciji, ali su dopunjeni sa 12 projekata iz Strategije razvoja

2018. (nakon usvajanja iste). Više o realizaciji strateških dokumenata i stepenu postignuća na dostizanju ciljeva Vijeće će biti informisano kroz zasebnu informaciju u prvom kvartalu 2014 godine.

EKONOMIJA I POSLOVNO OKRUŽENJE

Atraktivnost općine u pogledu poslovnog ambijenta, rada već dokazanih privrednih subjekata, kao i mogućnosti i pogodnosti koje u tom pogledu postoje, već je prepoznata u okruženju, kod domaćih i međunarodnih investitora, ali i domaćih i međunarodnih institucija i organizacija. Kao dokaz tome možemo pomenuti da je općina Tešanj jedna od samo tri općine iz BiH koje su pozvane da učestvuju na Investicijskom forumu „BiH-UK“, koji je održan u Londonu tokom aprila mjeseca. I kod Poslovnih novina, Tešanj je kroz serijal članaka predstavljen kao destinacija u kojoj se izgrađuje povoljni ambijent za investicije. Učešće općine Tešanj u izvozu Federacije BiH je 5,33 % (podaci za 2012. godinu), a uvoza 4,14 %¹. Iz općine tešanj se izvozi u više od 50 zemalja diljem svijeta.

Ekonomski pokazatelji govore da ekonomija općine Tešanj imala rast i u 2013 godini. U pogledu broja zaposlenih prisutan je rast posljednje tri godine. Isto tako, zadnje tri godine je prisutan rast vrijednosti izvoza. Prisutan je i trogodišnji rast GDP-a, koji je u iznosio 2012 za građane općine Tešanj 4056 KM po glavi stanovnika². Na prostoru općine posluje 2416 poslovnih subjekata, 789 pravnih osoba, 420 jedinica u sastavu i 907 obrta³. Prosječan broj preduzeća na 1000 stanovnika je 43,7, što je iznad prosjeka Zeničko-dobojskog kantona. Tokom 2013. godine registrovana su 84 obrta/srodne djelatnosti (29 obrta, 10 poljoprivrednih djelatnosti, 1 cestovni promet, 43 prevoza za vlastite potrebe). U odnosu na 2012 godinu u općini Tešanj postoji trend rasta broja obrta, premda u većini kantona to nije slučaj.



- Općina Tešanj je među prvima u Bosni i Hercegovini ponudila zemljište bez naknade, bez naknade za uređenje građevinskog zemljišta i administrativnih troškova prema Općini. Lokacija VILA u Bukvi je od Općinskog vijeća odabrana za ovaj projekat. U 2012. i 2013. godini proveden je postupak za ulazak prve investicije na ovakav način SGI, a pred kraj godine donesena je odluka za novi javni poziv. Trenutno postoje iskazani interesi za još neke investicije, o čemu će se Općinsko vijeće odrediti u narednom periodu.
- Saradnja sa Udruženjem privrednika i privrednicima, zanatlijama i potencijalnim investitorima ostvaarivala se u duhu otvorene i neposredne saradnje. Održavani su tematski sastanci (sajam 2013, upravljanje poslovnim zonama,...), a Općinski načelnik je tokom godine

¹ Izvor: Makroekonomski pokazatelji po kantonima za 2012, juni 2013; Federalni zavod za programiranje razvoja

² Izvor: Federalni zavod za programiranje razvoja

³ Zeničko-dobojski kanton u brojkama 2013

- posjećivao poslovne subjekte u različitim prilikama (planiranje investicija, poslovni rezultati i dr.)
- c) Tokom 2013 godine završen je jedan dio postupka eksproprijacije zemljišta u Poslovnoj zoni Glinište. Pripremljeni su i kandidovani novi projekti za obezbjeđenje poslovne infrastrukture. Iz ovih sredstava bi u 2014. godini trebalo biti investirano 300.000 KM u Poslovnu zonu Glinište i 100.000 KM u Poslovnu zonu Bukva. Upravo su provođene aktivnosti za uklanjanje dijela objekata tzv. izbjegličkog naselja rješavanjem statusa trenutnih korisnika.
- d) Hotel – U maju 2013. godine započeta je dugo očekivana obnova hotela u Tešnju. Nakon pripreme i usvajanja Urbanističkog projekta kojim je obezbijeđen kompromis javnog i privatnog interesa, te rješavanja nekih od ranije neriješenih imovinsko-pravnih odnosa, potpisan je ugovor kojim je općina prihvatila izmjestiti instalacije toplovoda i vrelovoda kako bi investitor krenuo u realizaciju prve faze obnove hotela. Potpisan je ugovor sa garancijom završetak prve faze radova (sa uključenim zatvaranjem otvora i fasadom). Radovi su još u toku i prema posljednjim najavama očekuje se ispunjenje ugovorenih rokova, što podrazumijeva investiciju od oko 1,4 miliona KM. Upravo s radovima tokom 2013. godine završeno je projektovanje (glavni projekat) desne obale Tešanjke, tj. prostora ispred Doma kulture, zgrade banke i hotela. Trenutno su u toku pregovori oko načina zatvaranja finansijske konstrukcije za finansiranje izgradnje, koja je na izvjestan način i preduslov završetku radova na hotelu.
- e) Prethodne godine realiziran je Sajam privrede Biznis 2013. Općina je bila aktivna podrška udruženju privrednika u ovom projektu. Tokom 9. sajma tešanjke privrede općinu Tešanj su posjetile brojne delegacije diplomatsko-konzularnih predstavništava: Češka, Austrija, Mađarska, Japan, Slovenija, Makedonija, Crna Gora... Uključenjem općine obezbijeđena je podrška GIZ-a (Njemačko društvo za tehničku pomoć i međunarodnu saradnju) u analizi i sagledavanju razvoja sajma privrede u budućnosti, te je na taj način pripremljen Poslovni plan 10. Sajma tešanjke privrede.
- f) U saradnji sa HOLDINA izvršeno je projektovanje prostora oko benzinske pumpe INA u naselju Simetrle. Usaglašavani su interesi zajednice, koji bi uključivali proširenje pješačkih staza uz RP 474, te gradnju 30-tak novih garaža i 15-tak parkinga kroz neki oblik javno-privatnog partnerstva. Više o tome Vijeće će saznati kroz posebnu tačku dnevnog reda u prvom kvartalu 2013. godine
- g) Tokom 2013. godine realiziran je dio planskih aktivnosti u projektu BEAR, promocija mikroregije BEAR „Sredine poslovne izvrsnosti“ općina Teslić-Tešanj-Žepče. Realizovan je zajednički nastup na 2. sajmu NEXPO 2013. koji je tokom septembra 2013.godine održan u Rijeci/Opatiji, uz finansijsku podršku GIZ-a. Projekat pod istim nazivom i sličnim sadržajem kandidovan je i na 7 poziv EU, krajnji rezultati se još očekuju.
- h) Anagažmanom USAID-a i njihovom donatorskom pomoći, te učešćem općine tešanj ili Agencije za razvoj realizirani su neki projekti koji doprinose zapošljavanju na našim prostorima. Podrška postavljanju sušare za ljekovito bilje Kalošević, podrška otkupu mlijeka i proizvodnji sira – Zlatna kap, a putem Agencije za razvoj kandidovan je i ugovoren projekat Program dokvalifikacije i prekvalifikacije, koji je u toku.
- i) Općina je izvršila pripreme za obezbjeđenje BFC sertifikata („Općina sa povoljnim poslovnim okruženjem).

EKOLOGIJA

Otpadne vode - U 2013. godini je završen Idejni projekat jedinstvenog kanalizacionog sistema za cijelu općinu, te ugovorena izrada glavnog projekta. Izvršeno je usklađivanje projektnog sažetka (project fiche) za Evropsku investicijsku banku, te je nakon odobrenja banke i resornog ministarstva potpisan Ugovor o kreditiranju projektovanja (preostalog) i izgradnje sistema prikupljanja i tretmana otpadnih voda za općinu Tešanj. Vrijednost ugovora je 9.500.000 KM. U toku su i postupci prikupljanja drugih pratećih dokumenata i dozvola (vodni akti, elaborat o zaštiti okoline...). Uskoro bi se pred Vijećem trebala naći Odluka o utvrđivanju javnog interesa kao korak u rješavanju imovinsko-pravnih odnosa.

Vodosnabdijevanje – Razvoj novih vodovodnih sistema je redovna aktivnost općine Tešanj. U prošloj godini realizirano je slijedeće:

- Pripremljeni glavni projekti za gradnju novih bunara u Jelah polju (PEB 1 i PEB 2).
- Završeni radovi i obezbijeđene sve dozvole za pušanje u sistem ranije pravljene bunara u Miljanovcima. Trenutno je u fazi probni rad, sa količinama vode od 4,8 litara u sekundi.
- Završena još jedna faza gradnje vodovoda u O. Planjama, ugovor iz 2012.
- Ugovorena nova faza radova na vodovodu Medakovo-Trepče (vrijednost 185.000 KM). Radovi su još u toku.
- Ugovoreni su radovi na prvoj fazi dogradnje vodovoda Tepe-Hrvatinovići, veći dio završen tokom 2013.
- Ugovoreno i u završnici projektovanje novog vodovodnog sistema u Raduši (vrijednost cca. 35.000 KM).

Zbog povoljnije hidrogeološke situacije bilo je manje redukcije u snabdijevanju, ali je ipak tokom godine podrškom općine, a putem vatrogasne jedinice dopremana voda ugroženim dijelovima.

Upravljanje otpadom – Tokom 2013. godine općina Tešanj je aktivno sudjelovala u razgovorima oko regionalnog prikupljanja i spaljivanja otpada. Zainteresovana kompanija iz Verone (Italija) je iskazala namjeru da spalionicu otpada pravi u Tesliću, a da preuzima otpad i sa područja općine Tešanj. Prije ili kasnije će se morati organizirati regionalna deponija, za nekih 10 općina. Interes općine Tešanj je da ta regionalna deponija ne bude ni blizu ni daleko zbog cijene prevoza.

Putem udruženja Eko mladi nastavljena je aktivnost prikupljanja PET ambalaže putem škola. Kraj prethodne godine dočekan je sa sakupljenih 2.000.000 PET boca putem škola i oko 500.000 boca putem JP Rad.

Drugo – U mjesecu maju desio se ekološki incident na rijeci Usori, zagađenje izazvano ispuštanjem otrovnih hemikalija na prostoru općine Teslić. Općina je koordinirala veći broj subjekata u dokazivanju učinjenog, asanaciji rijeke Usore, te pripremanju tužbenog zahtjeva putem Općinskog pravobranilaštva. Za februar je zakazana prva rasprava po tužbi općine Tešanj prema Destilacija a.d.

Uz podršku i saradnju sa Agencijom za vodno područje rijeke Save u dva projekta je izvršeno uređenje korita i obala rijeke Usore u rejonu Kaloševića. Ukupna vrijednost projekata je cca. 110.000 KM. U pripremi su projekti za 2014. godinu za uređenje korita rijeke Usore na prostoru općine Tešanj.

MLADI

I u 2013 godini mladi su imali podršku kroz različite modele:

Stipendije svima je aktivnost koja se nastavlja, pa je tokom prethodne godine općina omogućila 340 stipendija iz budžeta općine Tešanj. Najavljena je podrška za ovaj projekat Ministarstva obrazovanja ZDK, ali je za sada sve još na obećanjima. Ne želeći kvariti kredibilitet općine niti dovoditi studente u nezavidnu situaciju općina je isplatila sve stipendije.

Općina je provodila aktivnosti za potpisivanje ugovora sa kantonom za još oko 150 stipendija. Podržavali smo predškolski odgoj novčanim podsticajima, osnovne i srednje škole kroz podršku u materijalnom obezbjeđenju osnovnih potreba. Općina je finansirala sva školska takmičenja u znanju i sportu. Krajem nastavne godine organiziran je prijem za najbolje učenika, pa je tako u 2013. na prijemu Općinskog načelnika na Gradini prisustvovalo više od 80 učenika u pratnji profesora i roditelja, te dodijeljeno 48 nagrada.

Realizirani su i projekti neformalnih grupa kroz Omladinsku banku ukupne vrijednosti projekata preko 40.000 KM. Putem projekta Poslovne ideje mladih, mladima je data podrška u pokretanju vlastitog biznisa (za registraciju poslovnih aktivnosti i doprinose u prvoj godini poslovanja). U 2013. godini ugovoreno je pokretanje 7 novih poslovnih subjekata sa 9 novih radnih mjesta. Tokom tri godine ovog projekta općina je finansijski pomogla formiranje 16 novih poslovnih subjekata i zapošljavanje 23 mlade osobe.

KULTURA I NASLIJEĐE

Područje kulture će biti tretirano kroz izvještaje triju javnih ustanova koje djeluju u području kulture i informaciju o radu udruženja građana i Općinsko vijeće će imati priliku da na taj način raspravlja na ovu temu. Ovdje želimo naglasiti činjenicu da i pored ekonomske krize i situacije u BiH u kojoj se gase temeljne institucije kulture naša lokalna zajednica nije dovedena u takvu situaciju.

Treba naglasiti da su u prethodnoj godini organizirane 3 općinske kulturne manifestacije kojima su obilježeni značajni datumi za općinu Tešanj (utvrđeni Statutom), te da je općina podupirala i druge javne i kulturne sadržaje koje su organizirala udruženja građana ili mjesne zajednice. U općinskim manifestacijama organizirano je 8 koncerata, 10 izložbi, 3 pozorišne predstave, 14 promocija...

U području kulturno-historijskog naslijeđa realizirani su određeni projekti na Starom gradu Tešanj, u vrijednosti oko 75.000 KM (sanacija zidina i prva faza gradnje prilaza), a sredstva su obezbijeđena izvan budžeta općine Tešanj. Osim toga pripremani su projekti za nastavak radova u 2013. godini, tako da je na različite načine već obezbijeđeno ulaganje za 2014. godinu u iznosu preko 50.000 KM.

Projekat iz Strategije razvoja za dovršetak gradnje nove zgrade biblioteke tokom cijele godine bio je aktuelan i mnogo napora je utrošeno na obezbjeđenje donatorskih sredstava. Usmene najave donacije za završetak ovog projekta smo već dobili i očekujemo zvaničnu pismenu potvrdu tokom januara.

POLJOPRIVREDA

O razvoju poljoprivrede kao i mjerama koje su poduzimane u tom području Općinsko vijeće će biti upoznato kroz Informaciju o stanju u poljoprivredi i realizaciji Programa novčanih poticaja u 2013.

godini. Treba naglasiti da je realizacija sredstava za podršku poljoprivredi ispunjena prije kraja 2012., tako što su korisnicima transferirana odobrena sredstva.

Općina je tokom 2013. godine vršila analizu zdravstvene ispravnosti poljoprivrednih proizvoda. Pripremljen je Elaborat o uspostavi protugradne zaštite. Projekat je predstavljen i resornom ministarstvu, te će putem Agencije za razvoj i općine biti kandidiran na različite adrese za obezbjeđenje potrebnih sredstava.

KOMUNALNA INFRASTRUKTURA I SAOBRAĆAJ

Saobraćajna infrastruktura

Na prostoru općine ukupno je 472 kilometra cesta različitih kategorija. U općinskoj nadležnosti bilo je ljetno i zimsko održavanje na lokalnim i nekategorisanim cestama. Ukupno je održavano 230 km asfaltnih i 193 km makadamskih cesta. O gradnji i uređenju saobraćajne infrastrukture biće riječi u Izvještaju o realizaciji Liste kapitalnih ulaganja za 2013. godinu.

Uz značajan angažman (organizacioni i finansijski) općine Tešanj izvršena je rekonstrukcija raskrsnice u Jelahu. Općina je obezbijedila potrebne saglasnosti i rješavanje dijela mogućih imovinsko-pravnih odnosa, te sufinansiranje radova u iznosu od 50.000 KM. U svim fazama projekta jasno je naglašena upitnost ponuđenog rješenja semaforizacije, međutim stručni stav, nekadašnje federalne direkcije za ceste, JP ceste FBiH bio je da je to najbolje rješenje. Tokom 2013. godine izvršena je rekonstrukcija klizišta na putu R 474, a inicijativom općine i značajnija sanacija ove regionalne ceste.

U postupku kategorizacije javnih cesta u FBiH, općina Tešanj je aplicirala projekat prekategoriacije lokalne ceste LC 16 od kružnog toka (Tešanj) do skretanja za Šije i lokalne ceste LC 13 (Medakovo-Šije) u regionalnu cestu. Usmeno je potvrđeno prihvatanje prijedloga i očekuje se objavljivanje konačnog dokumenta o novoj kategorizaciji čime bi se okončalo proglašenje novog kraka regionalne ceste.

Tokom godine realizovana je i prva faza postavljanja vertikalne signalizacije za obilježavanje industrijskih zona na području općine Tešanj. Pored toga općina je inicirala rješavanja sigurnosti saobraćaja u Ljetiniću, Kaloševiću i Šijama kod nadležnih institucija i postavljanju adekvatne saobraćajne signalizacije.

Javna rasvjeta

Po inoviranju Odluke o javnoj rasvjeti kojom su propisane tehnički i elementi po pitanju izgradnje i održavanja objekata javne rasvjete, uveden je red u ovoj oblasti. Mjesne zajednice su i dalje te koje grade i održavaju rasvjetu a općina plaća utrošak električne energije za 2989 stubova rasvjete. U 2013 godini je sistem upotpunjen sa izgradnjom rasvjete u O. Planjama i Dobropolju. Mreža je u manjem obimu proširena u nekim MZ-cama. Tako da je došlo do povećanja broja rasvjetnih stubova 214. Ugradnjom štednih sijalica potrošnja električne energije za 2011. god. je iznosila 202.287 KM, za 2012 god. 175.025 KM, a u 2013 god. iznosi 160.000 KM i pored proširenja mreže za 214 rasvjetnih stubova. Izvršena je zamjena 330 klasičnih sijalica novim, štednim. Radi lakšeg praćenja proširenja mreže i evidentiranja kvarova u 2013. god. započeto je označavanje i numerisanje rasvjetnih stubova na području Tešnja i Jelaha, što će biti nastavljeno u narednoj godini. Nastavljen je pristup racionalizacije i štednje, i prilično su iscrpljene mogućnosti kroz štedne sijalice.

Adekvatnim odlukama i javnim pozivom ugovoreno je iznajmljivanje stubova javne rasvjete za reklamu, što će na trogodišnjem nivou donijeti nove prihode u budžet općine.

Komunalna higijena

Program komunalne higijene se najvećim dijelom realizuje kroz godišnji ugovor sa JP Rad Tešanj. Ovogodišnji program komunalne higijene je proširio obuhvat na čišćenju putnih pojaseva kao i na Industrijske zone Ciglana i Ekonomija u Jelahu. Za ovaj obuhvat potrošeno je cca 260.000 KM. Uređenje javnih površina koje nisu obuhvaćene Ugovorom sa JP Rad Tešanj, je rađeno uz angažovanje učenika Mješovite srednje škole, MZ-a, NVO-a, udruženja građana, a posebno angažovanjem udruženja Eko mladi Jablanica. Provedeno je više akcija na čišćenju cca. 150 km putnog pojasa, a neki putni pravci su rađeni više puta. Očišćeno je nisko rastinje u Industrijskoj zoni Bukva i Ciglana u površini cca. 2 hektara, u parku Obješenica i Šehagička u površini 1 hektara, obala korita rijeke Tešanjka od kružnog toka do Bukve površine 0,5 hektara, putni pojas od Krndije do mosta kod „Katange“ površine 1 hektar kao i niska rastinja pored putnih pojasa površine 10 hektara.

JAVNA PREDUZEĆA I USTANOVE

Općina je osnivači 8 javnih ustanova i 3 javna preduzeća. U ovom izvještaju treba pomenuti da je Općinski načelnik imao direktnu saradnju sa Nadzornim i Upravnim odborima, da je svaka javna ustanova i preduzeće imalo usaglašene godišnje ciljeve rada.

O radu javnih ustanova i preduzeća Vijeće će se detaljno informisati putem Informacije o radu javnih ustanova i Izvještaja preduzeća.

MJESNE ZAJEDNICE

Informacija o radu mjesnih zajednica za 2013. godinu (nakon završnih računa MZ) će sadržavati detaljniji pregled rada mjesnih zajednica. Treba naglasiti da su mjesne zajednice tokom 2013. godine okončale implementaciju izbornih rezultata (u januaru 2013 izuzev jedne MZ). Mjesne zajednice su radile u okviru svojih ovlaštenja, te održale 241 sastanka savjeta MZ i 71 sastanak skupštine MZ (2,84 po MZ), sa ukupno 865 odluka i zaključaka koji su redovno dostavljani općini na uvid. Ukupno 517 aktivista u organima MZ bili su podrška i inicijatori brojnih aktivnosti.

NVO

Općina je putem javnog poziva finansirala određeni broj projekata u 2013. godini, o čemu će Općinsko vijeće posebno biti informisano kroz Informaciju o radu udruženja građana, koju bi Vijeće trebalo razmatrati na nekoj od narednih sjednica.

Krajem 2011. godine inovirana je Odluka o kriterijima za finansiranje projekata udruženja građana, kojom se uređuju odnosi i način finansiranja rada udruženja. Odluka je unaprijeđena prema LOD metodologiji koja je razvijena od UNDP-a (Razvojni program Ujedinjenih nacija u BiH). Od UNDP-a smo ocijenjeni kao općina koja je zabilježila najveći napredak tokom trajanja projekta LOD, u kojem su za općinu Tešanj korištena sredstva Evropske unije od oko 150.000 KM. Nakon ovakve ocjene odabrani smo kao jedna od četiri najuspješnije općine u BiH u ovom području, te nam je omogućeno korištenje dodatnih sredstava IPA za BiH putem UNDP-a. Odabrana su dva projekta lokalnih udruženja čija realizacija još traje, a finansirana je sa oko 20% sredstava općine i oko 80% sredstava IPA. Projekat LOD je ocijenjen kao jedan od uspješnijih projekata koje finansira EU na balkanu.

Pozvani smo kao jedina općina iz BiH da krajem januara u Briselu predstavimo svoja iskustva u radu sa NVO sektorom i iskustva učešća u LOD projektu.

BORAČKE POPULACIJE

Općina nema neposrednu nadležnost u području ostvarivanju prava boračke populacije, ima samo prenesene obaveze viših nivoa vlasti (kantona i federacije) da servisira obaveze iz njihovih nadležnosti. Općina je radila po nalogima kantona određene poslove, dajući i sama podršku (predviđenu kroz Budžet) da se dio problema boračke populacije umanja ili riješi. Ukupne prilike opterećuje situacija u kojoj općina izvršava kantonalne poslove boračko-invalidske zaštite, a Kanton izdaje rješenja koja ne prate adekvatna sredstva. Zbog toga se neopravdano prenosi nezadovoljstvo na općinu Tešanj. Dio tih prilika se može vidjeti i kroz tabelu koja sadrži podatke o obavezama iz 2011., 2012. i 2013. godine. Općina je tokom 2013. godine vršila administrativni servis u boračko-invalidskoj zaštiti

Naziv postupka	Broj zahtjeva	Uvaženo zahtjeva	Odbijeno zahtjeva	Neriješeno zahtjeva	Odobrena sredstva	Isplaćena sredstva
JNP putem organa uprave (općinska sredstva)	645	625	12	7	44908	44908
Dodjela prehrambenog paketa (općinska sredstva)	301	301	0	0	12675	12675
Vanredna novčana	167	155	12	0	36600	11200
Zahtjev za pomoć u liječenju	182	138	35	9	56850	20300
Nabavka ortopedskog pomagala	2	0	2			
Pomoć u nabavci udžebenika	693	630	63	0	78850	78850
Pomoć u stambenom zbrinjavanju (Kanton)	0	0	0	0	U 2013. nije bilo postupka dodjele a dug za stambeno za 2012.godinu je 251.400 KM a za 2011.godinu 6.200 KM	
Zahtjev za odobravanje stipendija	164	0	0	164	Trenutni dug za stipendije za 2013. godinu je 63.150 KM.	
Bansko klimatsko liječenje	92	45	43	4		
Zahtjev za pomoć u snošenju troškova dženaze	92	88	2	2	39835	14108
Zahtjev za ličnu invalidninu	1	0	1			
Zahtjev za porodičnu invalidninu	125	125	0			
Zahtjev za zdravstveno osiguranje	21	21	0			
UKUPNO	2485	2128	170	186	590468	182041

Ukupne neisplaćene obaveze boračkoj populaciji na dan 31.12. iznosile su 408.427 KM.

Saradnja sa boračkim udruženjima se odvijala tokom cijele godine i može se ocijeniti uspješnom. Putem ovih udruženja značajan broj pripadnika boračke populacije u različitim kategorijama je imao dodatnu podršku od općine Tešanj. Konkretno, putem udruženja RVI 321 korisnik je ostvario određenu podršku, putem udruženja PPB 1007 korisnika, te putem JOB-a 1621 korisnik.

PENZIONERI, SOCIJALNA ZAŠTITA

Koliko god općina nastojala da pomogne, rješenje problema sa kojima se susreće populacija penzionera, cca. 4400 penzionera sa područja općine, ne može ponuditi općina. Prisutno je 2008 korisnika starosnih penzija, 958 invalidskih i 1458 porodičnih penzija i broj penzionera u posljednje tri godine je u blagom porastu. Ukupna prosječna penzija iznosila je 321 KM. Kao i prethodnih godina općina je imala intenzivnu saradnju sa Udruženjem penzionera. Putem udruženja penzionerima je pomagano kod troškova ukopa i nekih drugih troškova (o tome se Vijeće informiše posebnim Informacijama). Sva planirana i ugovorena sredstva po ovom pitanju su transferirana. O raseljenim i problemima povratka Općinsko vijeće je informisano kroz posebnu Informaciju, a informacija o radu javnih ustanova obuhvatit će i socijalnu zaštitu.

DOMAĆE I MEĐUNARODNE INSTITUCIJE-SARADNJA SA DRUGIMA

Viši nivoi vlasti

Odnosi općine s višim nivoom vlasti tokom 2013. godine bili su često pod različitim političkim utjecajima. Redovni dio prenesenih obaveza općina Tešanj realizira u potpunosti i bez problema. Ipak, politička kriza sa viših nivoa vlasti se prenosi i na općinu Tešanj.

Od preuzimanja dužnosti novog sastava Općinskog vijeća i novog Općinskog načelnika, dakle od novembra 2012. godine, nije bilo zvanične posjete Premijera ZDK (gosp. Pljevljaka kao ranijeg, kao ni Husejnagića aktuelnog Premijera) niti Vlade ZDK. Premijeri i ministri su samostalno dolazili u Tešanj nekada političkom/stranačkom linijom, a nekada na javne događaje (kulturne, sportske, proslave Nove godine..., čak i posjete poslovnim subjektima, itd.). Dolasci premijera i pojedinih ministara nisu najavljivani, što govori o odnosu spram domaćina – spram lokalne vlasti. Bez obzira na takav odnos Općinski načelnik je primio svaki najavljenju delegaciju i direktno ili putem službi komunicirao sa svim institucijama u BiH. Općina je u svim situacijama ispunjavala preuzete obaveze.

Prethodnu godinu je karakterisalo smanjenje transfera sredstava viših nivoa vlasti, ali i itekako prisutna primjena dominantno političkih kriterija kod raspodjele raspoloživih sredstava (primjer sredstva GSM i nepoštivanje bilo kakvih transparentnih i objektivnih mjerila, poput broja pretplatnika, vrijednosti prometa, broja stanovnika i sl.). Ukupan rad općine otežali su i deficiti viših nivoa vlasti, te pravljenje i ugovaranje obaveza koje nisu redovno plaćanje.

Druge i općine u okruženju

Nastavljena je saradnja sa drugim općinama. Naročito je bila prisutna intenzivna saradnja sa susjednim općinama Doboj jug i Usora (zajednički uređaj za tretman otpadnih voda i dr.), te općinama Žepče i Teslić u području promocije ove tri općine kao mikroregije pogodne za investiranje (projekat BEAR). Sa susjednim općinama održan je čitav niz različitih sastanaka. Tokom 2013. godine

općinu su posjetile zvanične delegacije općina: Ilidža, Vareš, Trnovo, Velika Kladaša i Vitez, a Općinski načelnik je posjetio Maglaj, Visoko i Zenicu.

Članstva u drugim organizacijama

Općina je jedan osnivača u Savezu općina i gradova i aktivno je učestvovala u radu ove organizacije, kroz rad u godišnjim skupštinama, rad u radnim tijelima i sl. Pored toga općina je osnivač i sufinansijer regionalne razvojne agencije REZ Zenica. Održan je jedan sastanak sa direktorom REZ-a i vršena pismena korespodencija zbog činjenice da svi osnivači REZ-a ne izvršavaju svoje obaveze finansiranja a traže, pa i dobivaju određena prava. Slična situacija je i sa Zeničko-dobojskim kantonom. Najdobronamjernije je ukazano da je ovakvo stanje neodrživo i da će općina uskratiti podršku REZ-u ukoliko i drugi ne prihvate svoje obaveze, ili se promijene efekti rada i njihova distribucije na one koji ispunjavaju svoje finansijske obaveze.

Ambasade i međunarodne organizacije

Općina Tešanj je u 2013 godini aktivno sarađivala sa predstavnicima ambasada akreditovanih u Bosni i Hercegovini. Upriličena je zvanična posjeta ambasada SAD-a Njemačke, Češke, Austrije, Turske, Japana, Mađarske, Slovenije, Makedonije i Crne Gore.

Dio ostvarenih kontakata sa ambasadama rezultirao je direktnijim kontaktima sa razvojnim agencijama, privrednim komorama i sl.

USAID - Ova organizacija je u 2013. godini sufinansirala projekat unapređenje proizvodnje sira u zadruzi Zlatna kap, te finansirala podršku uspostavi proizvodnje, sušenja i otkupa ljekovitog bilja u Kaloševiću. Trenutno je u toku jedan projekat koji vodi Agencija za razvoj TRA, a u pripremi su dva ili tri nova projekta za 2014. godinu. Neki od njih su vrlo izvjesni za realizaciju.

TIKA – Zadržan je aktivan odnos sa Turskom razvojnom agencijom. Fokus saradnje je bila kandidatura dovršetka gradnje biblioteke Tešanj. Ponovljena je kandidatura i usmeno najavljeno odobravanje sredstava u visini od cca. 500.000 KM. Trenutno se čeka pismeni odgovor na aplikaciju iz Ankare.

GIZ - Intenzivna saradnja je ostvarena sa GIZ-om (Njemačko društvo za tehničku pomoć i međunarodnu saradnju), odnosno programom Prolocal (Program za lokalnu samoupravu i ekonomski razvoj). Cjelokupna saradnja se realizovala kroz tri područja: Promocija ekonomskih potencijala, Javno-privatni dijalog i Lanci vrijednosti. Tokom 2013. godine rađeno je na pripremi promotivnih materijala (letak, brošura i web-stranica) mikroregije BEAR „sredine poslovne izvrsnosti“ općina Teslić-Tešanj-Žepče.

UNDP – U toku je realizacija projektat „Jačanje lokalne demokratije 3“ (LOD3) u području organizacija civilnog društva. Učešće općine je visoko ocijenjeno i projekat je još u toku.

Pored navedenog općina je sarađivala i sa drugim organizacijama; Mozaik, Vesta, AHK, BIGMEV i brojnim drugim

Općinski načelnik

Mr.sc. Suad Huskić, prof.